

आकाशवाणी जयपुर—अजमेर
प्रादेशिक समाचार
दिनांक 10.10.2025 समय: 18.45 बजे

- प्रधानमंत्री नरेन्द्र मोदी रो काल पीएम धन—धान्य योजना अर दलहन आत्मनिर्भरता मिशन री सुरुआत रो कार्यक्रम
- प्रदेश मांय सहकारिता हलका ने मजबूत बणावण सारु नुवो सहकारी कानून बणायो जावेलां
- ए.टी.एस. पैली वाळां फौजियां रा कोटा ऊँ फर्जी तरीका ऊँ सरकारी नौकरी हासिल करण रा आरोप मांय 28 जणां ने गिरफ्तार कीनां
- विश्व मानसिक स्वास्थ्य दिवस रे मौके स्वास्थ्य अर परिवार कल्याण मंत्री जगत प्रकाश नड्डा टेली मानस ऐप समेत केई नुवी पहलां री सुरुआत कीनीं

000

प्रधानमंत्री नरेन्द्र मोदी रो काल नई दिल्ली रा पूसा इन्स्टीट्यूट ऊँ प्रधानमंत्री धन—धान्य योजना अर दलहन आत्मनिर्भरता मिशन री सुरुआत करण रो कार्यक्रम हैं कृषि मंत्री शिवराज सिंह चौहान आ जाणकारी दीनीं वे बतायो के ई योजना रा तैत सरकार कम उत्पादकता वाळा 100 जिलां री पिछाण कर र उत्पादकता बधावण रा उपाय लागू करेलां

000

प्रदेश मांय सहकारिता हलका ने मजबूत बणावण सारु नुवो सहकारी कानून बणायो जावेला, जो मौजूदा राजस्थान सहकारिता अधिनियम, 2001 री ठोड़ लेवेलां ई रा तैत आमसभा री सूचना व्हाट्सएप या ई—मेल रे जरिये देवण अर आमसभा नी राखण री सूरत मांय 5 हजार रुपया रा जुर्माना सरीखा प्रावधान करी ज्या हैं नुवा प्रावधानां रा तैत ऑडिट रिपोर्ट ने सहकारिता विभाग रा पोर्टल माथे अपलोड करणो जरूरी व्हेलां

000

संस्कृति अर पर्यटन मंत्री गजेंद्र सिंह शेखावत कह्यो हैं के देश मांय डिजिटाइजेशन री दिशा मांय तेज़ी ऊँ काम चाल रह्यो हैं वे नई दिल्ली मांय भारतीय राष्ट्रीय अभिलेखागार री ओर ऊँ “सुशासन और अभिलेख” मुद्दा माथे राख्यी ज्यी प्रदर्शनी रा उद्घाटन सत्र मांय बोल रह्या हां वे कह्यो के आ प्रदर्शनी पैली वाळा प्रधानमंत्री अटल बिहारी वाजपेयी अर पैली वाळा राष्ट्रपति ए.पी.जे. अब्दुल कलाम रा योगदान अर वां रा नज़रिया रो दरसाव करण वाळा कागजात माथे केन्द्रित हैं

000

निर्वाचन आयोग वोट देवण वाळां रा सुबीता सारु अंता विधानसभा उपचुनाव मांय इपिक सागे ई 12 दूजा फोटो पहचान पत्रां ने ई मानेलां मुख्य निर्वाचन अधिकारी नवीन महाजन बतायो के ज्यां रा नाम वोटर लिस्टां मांय है वे आधार कार्ड, मनरेगा जॉब कार्ड, पासपोर्ट, ड्राइविंग लाइसेंस या पैन कार्ड समेत 12 मांय ऊँ कोई एक कागज बता र वोट दे सकेलां अंता विधानसभा हलका मांय 1 अक्टूबर 2025 ताई कुल 2 लाख 27 हजार 5 सौ 63 मतदातावां रा नाम वोटर लिस्टां मांय मण्ड्योड़ा हैं विधायक कंवर लाल मीणा री विधानसभा सदस्यता रद्द व्हे जावण रे कारण वठे उप—चुनाव सारु 11 नवम्बर ने वोट पड़ेलां

000

देश मांय 22 सितंबर ऊँ लागू करी ज्यी जीएसटी री नुवी रेट पाछे पीएम कुसुम योजना रा तैत सूरज री रोशनी ऊँ चालण वाळा पम्प लगावण वाळा किसानां ने न्यारा—न्यारा बूता रा पंप संयंत्रां माथे 4

हजार 209 ऊँ 7 हजार 811 रुपया ताई बचत व्हेलां 22 सितंबर ऊ कंट्रोलर सरीखा सामान माथे जीएसटी री रेट 12 ऊँ घटा र 5 फीसदी कर दीरीजी हैं ई योजना रा तैत 60 फीसदी सब्सिडी दी जा रही हैं जो किसान जूनी रेट ऊँ रकम जमा करायी है वां ने बत्ती रकम पाछी दी जावेलां केंद्रीय संचार ब्यूरो री ओर ऊँ सिरोही अर सवाईमाधोपुर जिलां मांय जागरूकता कार्यक्रम राख्यी ज्यां सिरोही जिला रा झाड़ोली अर सवाई माधोपुर रा नीमोद मांय राख्यी ज्या आं कार्यक्रमों रो मकसद जीएसटी बचत उत्सव अर पोषण माह 2025 समेत जनता रा भला री न्यारी-न्यारी योजनावां री जाणकारी देवणो हों ई बाबत् रैली, संगोष्ठी, प्रदर्शनी, चित्रकला अर प्रश्नोत्तरी री होड़ां राख्यी ज्यीं ई दौरान ब्यूरो रा अहलकार, कलाकार अर आंगनबाडी कार्यकर्ता गांव वाळां अर विद्यार्थियां ने खास जाणकारी दीनीं कार्यक्रम मांय मौजूद लोगां ने साफ-सफाई री शपथ ई दिरायी ज्यीं

000

राज्य रो आतंकवाद निरोधी दस्तो "स्क्वायर पिरामिड" ऑपरेशन रा तैत 28 फर्जी जवानां ने गिरफ्तार कीना हैं एटीएस रा आईजी विकास कुमार आ जाणकारी दीनीं वे बतायो के दो महीना री जांच पाछे भारतीय खाद्य निगम रा 31 प्रतिष्ठानां माथे छापा मारी ज्यां गिरफ्तार करी ज्या आं लोगां माथे पीपीओ अर एक्स-सर्विसमैन आईडी कार्ड सरीखा नकली फौजी कागजात काम ले र पैली वाळा फौजियां सारू आरक्षित 90 फीसदी सुरक्षा कोटा रा तैत नौकरी हासिल करण रो आरोप हैं एटीएस जालसाजी रे दूजा संस्थानां ताई व्हेवण री शंका जतायी है, जिण री जांच करी जा रही हैं

000

विश्व मानसिक स्वास्थ्य दिवस रे मौके स्वास्थ्य अर परिवार कल्याण मंत्री जगत प्रकाश नड्डा आज नई दिल्ली मांय टेली मानस ऐप समेत कई नुवी पहलां री सुरुआत कीनीं ई मौके वे कह्यो के सिखायी ज्या काउंसलर्स रे जरिए बीस ऊँ बत्ती भाषावां मांय आ ऐप करीब 28 लाख मरीजां री परेशानियां दूर कीनीं हैं वे बतायो के टेली मानस ऐप माथे रोजीना करीब चार हजार लोग मदद मांगे हैं ई मौके केन्द्रीय स्वास्थ्य सचिव पुण्य सलिला श्रीवास्तव कह्यो के टेली मानस समेत देश री न्यारी-न्यारी डिजिटल पहलां रो मकसद सार्वभौमिक स्वास्थ्य कवरेज हासिल करणो हैं ई बीचे प्रधानमंत्री नरेन्द्र मोदी कह्यो है के विश्व मानसिक स्वास्थ्य दिवस म्हांने याद दिरावे है के मानसिक स्वास्थ्य, सगळां रा स्वास्थ्य रो खास हिस्सो हैं वे सोशल मीडिया पोस्ट रे जरिए जनता ऊँ ऐडो वातावरण बणावण बाबत् कह्यो जटे मानसिक स्वास्थ्य रा बारा मांय खुल र बातचीत करी जा सकें वे मानसिक स्वास्थ्य रा हलका मांय काम करण वाळां री सराहवणा कीनीं

000

सरकार आयुर्वेद स्नातक री भर्णाई करण वाळां मांय वैज्ञानिक शोध ने बधावो देवण रा मकसद ऊँ खास आयुर्वेद अनुसंधान छात्रवृत्ति कार्यक्रम रा चौथा दौर रो ऐलाण कीनो हैं आयुष मंत्रालय रे मुजब ई रा तैत राष्ट्रीय भारतीय चिकित्सा पद्धति आयोग-एन.सी.आई.एस.एम. ऊँ मान्यता मिल्योड़ा कॉलेजां रा तीन सौ आयुर्वेदिक चिकित्सा अर शल्य चिकित्सा स्नातक विद्यार्थियां ने 50 हजार रुपया रो वजीफो मिलेलां ई सारू पात्र विद्यार्थी 15 अक्टूबर ऊँ 15 नवंबर ताई नाम मंडा सकेलां आयुष मंत्रालय रे मुजब हाल ताई देश भर रा दो सौ 89 आयुर्वेद कॉलेजां रा पांच सौ 91 विद्यार्थियां ने इण रो फायदो मिल चुक्यो हैं

000

राजस्थान कर्मचारी चयन बोर्ड री ओर ऊँ गृह रक्षा विभाग मांय प्लाटून कमांडर रा 84 ओहदां माथे भर्ती सारू 22 नवंबर 2025 ने परीक्षा ली जावेलां अर्जी दाखिल कर चुक्या उम्मीदवार मर्जी व्हेवण परां 12 अक्टूबर 2025 की रात 11 बज र 59 मिनट ताई एसएसओ पोर्टल माथे जा र अर्जी पाछी ले सके हैं अर्जियां मांय नाम, जन्मतिथि, लिंग, फोटो, हस्ताक्षर अर शैक्षणिक योग्यता ने छोड़ र दूजी गलतियां 300 रुपया री फीस सागे 13 ऊँ 19 अक्टूबर 2025 ताई सुधारी जा सकेलां

000

प्रदेश मांय करवा चौथ आज हरख-उमाव अर धार्मिक आस्था सागे मनायी जा रही हैं सवाईमाधोपुर जिला मांय चौथ का बरवाड़ा रा चौथ माता मिन्दर मांय माता रा दर्शन सारू सजी-धजी महिलावां री लंबी लेणां निजर आयीं ई मौके महिलावां धणी री लंबी उम्र री कामना करता थकां खास पूजा-अर्चना कर रही हैं म्हाणा सवाईमाधोपुर खबरनवीस बतायो के मोटी तादाद मांय महिला जातरू रणथम्भौर किला माथे रा त्रिनैत्र गणेश मिन्दर मांय ई दर्शन सारू पूर्गीं

.....
भीलवाड़ा जिला रा रायला मांय करीब 100 साल जूना चौथ माता मिन्दर मांय ई करवा चौथ रे मौके खास पूजा-अर्चना सागे मेळो भर्यों सलूंबर रा बाजारा मांय ई करवा चौथ री खरीदी सारू आखा दिन मोटी तादाद मांय ग्राहकां री आवा-जाही रहीं सुहागिणां बर्तन, चूड़ियां, साड़ियां अर सजावटी सामान री खरीदी कीनीं

000

बीकानेर रा संभागीय आयुक्त विश्राम मीणा आज श्रीगंगानगर मांय ग्रामीण अर शहरी सेवा शिविरां अर फ्लैगशिप योजनावां रा तैत कराया जा रह्या कामां रो जायजो लीनों वे अहलकारां ने शिविरां मांय मौजूद रह र जनता री परेशानियां तुरत निपटावण रा हुकम दीनां पाली मांय ई जिला कलेक्टर एल. एन. मंत्री बीजापुर मांय लगायी ज्या ग्रामीण सेवा शिविर रो दौरा कीनों वे 15 आवासीय प्लॉटां रा पट्टा देवण समेत नाम सही करण अर नामान्तरण रा केई मामला निपटायां जिला कलेक्टर सेवाड़ी प्राथमिक स्वास्थ्य केंद्र रो ई दौरा कीनों

000